



Jens Kristian Therkelsen, Siumut  
Inatsisartunut ilaasortaq  
inatsisartut@ina.ala.gl

## **Air Greenlandip sullissinissamut isumaqatigiissutaa pillugu § 37 naapertorlugu apeqquteqaammut 2022-165-imut akissut**

27-09-2022

Suliaq nr.: 2022 - 17095

Id. nr. 79921662

Asasara Jens Kristian Therkelsen

Inatsisartut suleriaasianni § 37 naapertorlugu Air Greenlandip sullissinissamut pillugu Naalakkersuisunut apeqquteqaateqarputit. Apeqqutit uannit akineqartussatut innersuunneqarpoq. Apeqqutit matuma kinguliani allanneqarpoq, akissummillu malitseqarluni.

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

www.naalakkersuisut.gl

## **Apeqqut - AirGreenlandip sullissinissamut isumaqatigiissutaa, tassalu qulimiguulinnik nunaqarfinnut ilaasunik angallassinert eqqarsaatigalugit maannakkut ajorseriartumik sullinneqarneq aaqiiviginiallugu qanorpiaq Naalakkersuinikkut iliuuseqarniarpat?**

Akissut: Apeqquteqaatit Air Greenlandip Uummannamut eqqaanullu sullissinissamut isumaqatigiissutaanut tunngasutut paasivara, taamaattumillu akissuteqarninni taanna aallaavigissavara.

Air Greenlandimit ilisimatitsissutigineqarpoq, ukiuni kingullerni Uummannap Ikerasaallu akornanni ilaasut aallarnerillu imatut amerlassuseqarsimasut:

- 2018-imi ukioq kaajallallugu ilaasut 121-upput. Aallarnerit 58-iullutik.
- 2019-imi ukioq kaajallallugu ilaasut 133-upput. Aallarnerit 49-uullutik.
- 2022-mi ilaasut januaarimiit juulimut 92-iupput. Aallarnerit 33-usimapput. Tassalu angalanissanut pilersaarummi pilersaarutaasunit pingasunik amerlanerullutik.

Air Greenland ilisimatitsivoq, ilaasut piffissap ingerlanerani amerlassusii allangorarsimangitsut, tassalu agguaqatigiissillugu sapaatit akunnerannut angallavimmi ilaasut pingasuusarsimapput.

Aamma Air Greenland ilisimatitsivoq, siornatigut Uummannap distriktimilu nunaqarfiit akornanni sapaatit akunnerannut angalasarnerit marluk pilersaarutaasarsimasut, taakkunungalal Ikerasak ilaavoq. Taamaalilluni sapaatit akunnerata ataatsip ingerlanerani siumut utimullu angalasoqarsinnaasarsimavoq. Tunngaviusumik aallarnissanit pilersaarutaasunit marlunnit ataaseq ilaasussaqaannginneq peqqutigalugu angalanissaq ulloq ataaseq sioqqullugu tamatigunngajak taamaatinneqartarsimavoq.

Air Greenland ilisimatitsivoq, kiffartuussinissamut isumaqatigiissusiassanut nutaanut tunngavissiamik saqqummiussinermi kiffartuussinerup aningaasaqarnerullu angalarussutsimut naleqqussarneqarnissaat siunnerfigisimagitsik, taamaattumillu


Uummannap Ikerasaallu akornanni angallavimmi angalanissamut pilersaarummi  
pisinnaasani neqeroortigineqartuni sapaatit akunnerannut marloriartarneq  
pisariaqartitsinerpiamut naleqqussarlugu ataatsimut appartinneqarsimasoq.

Naalakkersuisut aamma Inatsisartut Aningaasaqarnermut Akileraartarnermullu  
Ataatsimiititaliap angalanissanut pilersaarut akueraat – aammalu pisinnaasanik  
tamakkiisunik atorluanaanissami tullerriaarinnermut tassunga isumaqataallutik,

Naalakkersuisut siulii ukiuni qulini atuuttussamik kiffartuussinissamut  
isumaqatigiissuteqarput, kiffartuussinerullu pitsaassusia qaffasinnerulissappat, tamanna  
aningaasanut inatsit aqqutigalugu aningaasanik amerlanerusunik  
immikkoortitsisoqarneranik kinguneqartussaavoq. Kissaatigineqarpat, Naalakkersuisut  
partiit allat peqatigalugit suleqatigiiffiusumik oqaloqatigiinnissamut peqataasinnaapput.

Tamanna oqaatigereerlugu oqaatigineqassaaq, angalanissanut pilersaarutip immikkut  
ittumik pisariaqartitsiviusunut naleqqussarneqarnissaa Air Greenlandip  
pisussaaffigimmagu. Assersuutigalugu tamanna timersornikkut pisunut annerusunut  
nalliuttunulluunniit atatillugu angalarussutsip pisinnaasanit annertunerunerani  
pisinnaavoq.

Neriuppunga qulaani allaqqasuni apeqquteqaatit akineqartoq.

Inussiarnersumik inuulluaqqusillunga  
  
Erik Jensen